

四庫全書

史部

欽定四庫全書

平定準噶爾方略正編卷四十二

乾隆二十二年秋七月丙辰

定邊右副將軍兆惠等疏奏哈薩克協擒阿睦爾撒納情形及擒獻逆黨達什策凌等

兆惠等奏言臣等因察訪逆賊阿睦爾撒納踪跡遣順德訥帶兵往古爾班察爾直至俄羅斯之境六月二十四日據順德訥報稱六月十三

日至鄂遜綽確特山遇哈薩克阿布賚之弟阿
布勒比斯稱係奉富參贊之令擒拏阿睦爾撒
納隨據哈薩克遣人告知阿布賚亦在此間因
酌帶十數人前往相見阿布賚云我已投順中
國

大皇帝願為臣僕因去年抗拒大兵昨又誤行對敵
是以畏懼藏匿總為阿睦爾撒納所累今欲擒
獻阿賊黨羽以贖前罪等語我告阿布賚云

大皇帝三路發兵務擒阿賊因爾哈薩克投順暫將
額爾齊斯一路停止進兵若阿逆不在俄羅斯
烏梁海即入爾境昨又據拏獲之厄魯特等供
逆黨額布濟即達什策凌烏勒木濟齊巴罕等
於我副都統鄂博什兵到前一日俱各分散我
等既屬一家當同往擒拏阿布賚云伊等若入
我界即當擒獻再我等哈薩克有三部落我係
鄂爾圖玉斯頭目奇齊玉斯烏拉玉斯皆我族

兄為長已遣人至塔什罕令其一體投順亦必遣人入

貢等語隨以馬二百餘匹易換官兵衣物銀兩於十六日辭歸是日過鄂遜綽確特山至塔爾滾河見有賊行踪跡次日尋至俄羅斯境之鏗格爾圖喇遣人告知十八日俄羅斯喀丕坦等至額爾齊斯河濱相見免冠叩請

大皇帝安因告以我將軍大臣為逆賊阿睦爾撒納

逃竄派兵分路查拏看賊衆大概逃入爾境應
遵彼此不納逃人之議擒拏送出喀丕坦等云
阿睦爾撒納前遣使來已拏送我察罕汗其本
身及屬人並未曾來我俄羅斯法度頗嚴豈敢
背約藏匿等語隨告以阿逆等即未到來自應
遵照前約傳知爾等各卡倫俟逆賊來時擒拏
解送并先將我等奉差索取之處行知薩納特
衙門仍將現在並無阿逆給文為據以便我等

回報將軍大臣轉

奏往復再三喀丕坦等因給與俄羅斯印文并行
文邊界遂於二十日帶兵回程路經烏梁海舊
地亦俱捉生詢問等因臣等又於二十七日據
哈薩克阿布賚遣使解送達什策凌齊巴罕前
至軍營告稱阿布賚等於十九日至阿爾察圖
適阿睦爾撒納率二十人來投告以明早相見
因先散其馬匹牲畜阿賊驚覺拋棄衣物同數

人逃去僅將達什策凌齊巴罕拏獲送來又遣人到霍集伯爾根處今將烏勒木濟拏獲如阿賊亦在彼處自必一併擒送等語臣等因諄切曉諭以阿布賚擒獻賊黨我

皇上自必嘉悅但阿逆一日不獲則三路大兵不能撤回恐驚動爾等游牧若擒獻阿逆我

皇上恩賞阿布賚等以及効力之人必更優渥來使等俱懽欣感激臣等復訊問達什策凌齊巴罕

僉供阿逆於本年三月帶鄂畢特等人衆搶掠
扎那噶爾布游牧忽聞大兵來信遂四散奔逃
後大兵尾追甚急阿逆即將糾合之巴爾達穆
特等游牧移至喀拉瑪而自率兵三百駐守額
卜克特山復為大兵擊敗只帶二十餘人逃入
哈薩克阿布賚雖好言安慰而阿逆仍生疑懼
及黎明時衆哈薩克前來搶奪阿逆已不知去
向又供稱阿逆投哈薩克時於途次告衆云我

等若投俄羅斯則此生為人奴僕倘哈薩克再
不相容則無路可去等語臣等看來使所告情
形及達什策凌等所供阿逆窮蹙已極必不能
倖逃法網現於哈薩克俄羅斯相通各路分哨
搜拏以期必獲其達什策凌齊巴罕先行押解
送京奏入

上諭軍機大臣曰兆惠富德奏稱哈薩克擒獻達什
策凌齊巴罕據來使所言知阿睦爾撒納勢甚窮

覺現在分路堵截等語所辦尚合機宜順德訥此
次甚屬奮勇効力著加恩賞給副都統職銜仍交
部議叙鄂博什雖追賊稍遲尚能竭力進勦從寬
免其議處其餘効力官兵著兆惠等查明報部議
叙

戊午

諭叅贊大臣雅爾哈善等辦理歸降之瑋齊達瓦等
事宜

上諭軍機大臣曰雅爾哈善等奏稱端濟布送到扎
那噶爾布首級及歸降之琿齊達瓦等請旨辦理
等語扎那噶爾布首級即於肅州通衢梟示其妻
女及噶爾藏多爾濟之妻俱著解京至琿齊達瓦
已諭成衮扎布許其贖罪如情願來京可派員押
送倘稍有猜懼即行正法其拏解額林沁達瓦辦
理伊等游牧之處俱遵照前旨行又扎那噶爾布
之宰桑庫圖古爾等游牧已照例辦理其端濟布

等隨帶博卓羅克等六人既供明已哈曼集去向
又為官兵嚮導者從寬免其正法

諭兩路將軍大臣駐劄兵丁事宜

上諭軍機大臣曰前經成衮扎布奏稱撤回兵丁交
滿福帶領駐劄吐魯番今思伊等閒住徒費口糧
昨據哈寧阿報稱巡查額林哈畢爾噶臺站頗為
寧靜已前赴兆惠軍營但嗎哈沁等於我兵既過
復行盜竊亦未可定著滿福派兵三百名由吐魯

番照哈寧阿所走臺站再行巡查其餘兵丁即回
巴里坤駐劄明歲辦理回部亦無庸多兵此項撤
回巴里坤兵丁或尚需調遣或竟行發回著兩路
將軍大臣酌議具奏

己未

訓飭定邊將軍成袞扎布等

上諭軍機大臣曰朕因成袞扎布舒赫德等此次進
兵辦事茫無頭緒即如辦理喇嘛一事因伊等倡

言煽惑玷黃教而害生靈必須大示懲創何以總
未奏及豈盡隨巴圖爾烏巴什前往土爾扈特耶
即巴圖爾烏巴什亦未必往土爾扈特不過隱藏
山僻邊界處所今巴圖爾烏巴什終在何處明瑞
色布騰巴爾珠爾所辦綽和爾烏喇特昂吉岱等
游牧現在如何俱應查奏正欲降旨傳諭適成袞
扎布等奏報克勒特之得木齊畢魯特等潛逃現
在派兵追勦又沙喇斯之三都克等游牧內移欲

帶兵尾隨防範等語夫軍營所恃惟在將軍大臣
成衮扎布雖為將軍尚未面受訓旨其一切機宜
俱諭知舒赫德令與將軍同心辦理伊起程之時
即有畏難之意看其節次奏摺不過招撫數鄂拓
克至伊犁行走一次便謂了局即如尾隨沙喇斯
游牧內移直欲藉作歸計耳將軍大臣欲歸官兵
孰不欲歸者舒赫德係獲罪至重之人朕加恩予
以自新之路早知伊仍畏怯如此不當遣往軍前

如奉到朕旨能恐懼改悔尚屬可追若因循如故將併治其前後之罪不知伊如何承受再鄂實為叅贊大臣宜知自効乃此次進兵以來隨行逐隊毫無奮勉亦著嚴加申飭可惜朕之巴圖魯侍衛官兵為此輩無用之人統轄實不勝憤懣著傳諭伊等加意振作將查拏喇嘛追勦巴圖爾烏巴什等事宜相機速辦至明歲辦理回部一事此時應加慎密現據拏獲奸細所供霍集占已聚兵防備

雖究無能為總以不使知覺為善前令於吐魯番
駐兵今恐聲息相聞仍令在巴里坤駐劄已傳諭
貝子額敏和卓矣

諭喀爾喀郡王桑寨多爾濟等解送達瑪林

上諭軍機大臣曰桑寨多爾濟等報稱副台吉占楚
卜等擒獲達瑪林馳驛解京等語桑寨多爾濟從
前不行嚴拿以致達瑪林逃脫毋庸議叙其聞信
擒拏奮勉効力人員分別加賞著將達瑪林解送

熱河行在達瑪林之罪與策登扎卜相等但多此一逃應將伊妻子一併查拏解京候旨

八月辛酉

諭定邊右副將軍兆惠等擒拏阿逆事宜

上諭軍機大臣曰兆惠等奏稱哈薩克解送達什策凌等之來使言及逆賊阿睦爾撒納夜遁時將器械鞍馬全行拋棄諒難免脫必被阿布勒比斯之人拏送等語哈薩克人等果能擒獻逆賊固屬甚

善但前聞伊等部落心頗不齊又聞阿布賚與阿
逆有誓是其擒獻與否尚未可定兆惠等曾奏云
如伊等將阿逆收留不即擒送即帶兵相機往辦
亦不擾其游牧所見甚是此際如尚未將阿逆擒
獻即遣使促之云恐爾等屬人衆多或有隱匿今
派兵協同搜緝庶可速擒為此先行通知庶不驚
擾游牧看其情形若何作速奏聞

壬戌

命議叙叅贊大臣唐喀祿等

上諭軍機大臣曰據唐喀祿車木楚克扎布奏稱准
兆惠咨文前赴科爾沁辦理阿睦爾撒納所留種
地之烏梁海等派兵先行令副都統職銜瑚爾起
續進途次捉生詢問知都爾伯特貝勒巴圖博羅
特台吉喇喇善公舍楞等與阿逆相通潛往額爾
齊斯河未隨其汗策凌遷移游牧隨派瑚爾起於
六月十五日帶兵前至輝巴朗山後擒獲巴圖博

羅特等勦其屬人其阿逆所留種地之烏梁海五十餘戶全行勦殺現在領兵赴塔爾巴噶台搜拏阿睦爾撒納哈薩克錫喇等語唐喀祿車木楚克扎布和衷商辦甚合機宜著交部議叙並將御用荷包鼻烟壺加恩賞賜其領兵擒拏巴圖博羅特等之瑚爾起亦著議叙首次得功之托郭齊等與勦殺烏梁海有功之侍衛穆倫保等俱分別獎賞陣亡官兵著交部議卹又

諭曰唐喀祿等奏將擒獲之巴圖博羅特等併其妻子交送布延圖軍營轉解熱河等語著納穆扎爾派員將巴圖博羅特等解送其妻子即於軍營正法所有差送行糧之侍衛德昇額授為二等侍衛差送文書之藍翎佛爾慶額授為三等侍衛仍令其傳送事件唐喀祿等摺奏即著其帶回

癸亥

定邊將軍成衮扎布等疏奏辦理克勒特游牧

成衮扎布等奏言臣鄂實等帶兵辦理克勒特
游牧追剿叛逆之各得秦人衆於七月十三日
追賊至哈什河悉行剿殺由烏納哈嶺回營又
因接應明瑞等甚屬緊要臣鄂實派兵二百名
令巴圖魯侍衛濟塞布等前往復派兵率副總
管莽蘇爾等將叛賊藏匿游牧者悉行剿殺查
克勒特一鄂拓克共十九得秦除莽蘇爾根達
什等八得秦移入內地外其叛逆之各得秦俱

陸續勦滅收馬駝三百餘牛羊五千餘又有暫
委總管之阿雜喇巴圖巴拉俱年未成丁被迫
從亂隨即投順協同勦賊但伊等祖父世為頭
目未便仍居本地或於軍營正法或賞給官兵
為奴至莽蘇爾根達什等情願內移可否安插
巴里坤附近俱請

旨遵行奏入

上諭軍機大臣曰成衮扎布等奏辦理克勒特游牧

內移之八得秦俱送交巴里坤大臣辦理其阿雜
喇巴圖巴拉著便中解送來京又奏稱鄂實派兵
二百交待衛濟塞布等帶往等語所奏究屬含混
明瑞等辦理綽和爾等鄂拓克一月有餘何以並
無信息且鄂實即應帶兵前往而轉派侍衛著傳
諭鄂實令其明白回奏又

諭曰前據成衮扎布等奏稱沙喇斯宰桑三都克將
瑪呼斯宰桑多爾濟擒獲今奏到供詞有托倫泰

令勿與三都克同行已將此情節報知將軍自必轉奏後多爾濟脫逃等語多爾濟本屬可疑三都克尚欲擒拏而托倫泰令其獨行侍衛等如此舉動不惟有悞公事亦且貽厄魯特姍笑托倫泰既辦理不善以致脫逃於前又推諉三都克於後極其無恥不加懲創非特無以服三都克之心而侍衛等亦不知儆懼可傳諭成衮扎布若對質果係實情即將托倫泰正法仍傳諭兩路軍營各侍衛

伊等奮勉効力者賜以巴圖魯名號倘以托倫泰
挾私取巧必照例正法斷不姑貸

命安插伯克托克托回人於吐魯番

上諭軍機大臣曰豆斌等奏稱額敏和卓呈報伯克
托克托所屬瑪木特托爾岱等男婦一百餘口自
哈喇沙爾投來或照厄魯特等之例安插或令與
吐魯番安插之回人同居等語從前吐魯番安插
回人係伯克托克托所屬此次投來之百餘口即

准其同居耕種著交與額敏和卓留心約束如有
潛逃一名即行拏獲治罪

乙丑

諭喀爾喀四部落辦理游牧事宜

上諭喀爾喀四部落汗王公台吉等曰前因爾扎薩
克台吉等不善經理游牧以致畢齊罕扣等盜竊
肆行理應嚴加懲治特派大臣查拏分別首從辦
理又以盜賊起於饑寒即發帑辦給貧人產業牲

隻并代還逋欠爾等游牧已覺寧靜恐爾扎薩克
台吉等習於玩愒以為盜賊既除不復為貧人籌
畫生計又或目前尚知約束日久漸至懈弛至爾
四部落盟長副將軍等統率所屬尤當察其貧困
之由俾謀生有策其或頑悍不悛者嚴加約束有
犯必懲務俾上下安全共享昇平之福是用再申
訓諭倘仍不加奮勉致蹈覆轍朕惟爾盟長副將
軍及各扎薩克台吉是問

丙寅

定邊右副將軍兆惠等疏奏哈薩克頭目霍集伯爾根等言語情形

兆惠等奏言七月初六日額卜克特西卡倫報稱有兵二百餘從愛呼斯雅爾河前來馬跡甚大似哈薩克人衆臣等遣侍衛達禮善帶兵往探初七日帶領哈薩克霍集伯爾根之子拜達里克喀喇巴喇特之弟瑪密等到營告稱聞阿

布賚投順

大皇帝因徧行曉諭各游牧我父兄聞信即帶兵搜
緝阿睦爾撒納先遣我等來見并擒巴雅爾屬
人尼瑪為贄以求賞賜臣等言尼瑪係我兵勦
滅餘賊無關緊要非阿睦爾撒納可比若擒獻
阿逆自有重賞因遣人往迎霍集伯爾根等於
初九日率屬六十餘人來至軍營跪請

皇上聖安并奉經祝頌

萬壽與臣等行禮據霍集伯爾根等言我等因掠取
準噶爾逃戶不知大兵已至邊界途中聞阿布
賚投誠

大皇帝此際前往擒拏阿睦爾撒納我等亦願為臣
僕臣等告言爾等前來甚是即將爾等職名及
投誠緣由奏

聞今阿布賚等已將達什策凌齊巴罕擒送祇有阿
睦爾撒納尚未擒獲阿逆罪惡滿盈係奉

大皇帝諭旨擒拏之賊阿逆不獲我等斷不撤兵且我諸路之兵暫停者因阿布賚投誠之故若爾等擒獻阿逆必受

大皇帝天恩重賞霍集伯爾根等言阿睦爾撒納毫無依倚我等何必留此一嗎哈沁若在我等游牧豈有不行擒獻之理或在他人游牧亦當報知協力擒拏臣等言阿逆料不能遠遁不過在爾等游牧即遠遁至布哈爾布魯特等處則我

兵必由爾游牧擒拏恐有驚擾此時如有人欲
獻出阿逆向爾等索馬以酬雖數百匹爾等不
妨給與我

大皇帝必加重賞仍給爾等馬價否則我等駐爾邊
界屯田長向爾游牧搜捕利害較然爾等可自
行度量霍集伯爾根等言我等豈不知此理俟
回游牧後必竭力擒獻臣等勞以酒食初十日
復設筵宴伊等飽食畢令其觀我兵校射相撲

又懸鎖子甲為的射必洞穿並令走馬獻伎衆
哈薩克皆稱讚歡笑十一日霍集伯爾根等辭
歸臣等復加諄諭伊等懇給印文為投誠之據
復於兩營之間安設卡倫令官兵將所餘什物
及俘獲人口與哈薩克交易馬匹共得馬二百
餘匹臣等伏覩霍集伯爾根喀喇巴喇特情詞
恭順謹將給與印文及伊等所屬頭目名單錄
呈

御覽奏入得

旨下部知之

申諭定邊右副將軍兆惠等擒拏阿逆事宜

上諭軍機大臣曰覽兆惠等先後奏摺看其情形逆賊阿睦爾撒納即可就擒但不當因哈薩克投順遂爾倚恃顓頊阿逆奸狡性成或自哈薩克逃出遠離塔爾巴噶台潛伏僻地或料知入冬我必撤兵於察罕烏蘇等處藏匿此處宜分派兵丁輕騎

來往嚴行搜緝其哈薩克頭目霍集伯爾根等著
傳旨撫慰并各賞蟒緞二端大緞四端以示獎勵

丁卯

諭叅贊大臣納穆扎爾辦給都爾伯特部落地畝事

宜

上諭軍機大臣曰前納穆扎爾奏稱都爾伯特汗策
凌等請於烏蘭古木種地但此地已給與察達克
應請旨遵行朕諭以烏蘭古木地畝寬廣若與察

達克等地畝分畫疆界亦可准其耕種命納穆扎爾前往查勘今策凌等於富紹前來復附奏懇請在烏蘭古木耕種在科卜多額克阿喇勒游牧等語是伊等耕牧各有處所自可相容著納穆扎爾酌量情形如事屬可行即傳諭策凌等准其所請查勘指給至所種地畝既與察達克屬人錯雜難保無盜竊之事更須派員巡緝嚴行禁止毋致滋事

已已

諭兩路將軍大臣會勦巴圖爾烏巴什

上諭軍機大臣曰據雅爾哈善等奏稱差往兆惠等
軍營賁送事件之索倫哲森保等行至額貝淖爾
遇賊數十人搶掠致將事件遺失途遇庫圖齊訥
爾之厄魯特告稱巴圖爾烏巴什近將巴爾達穆
特鄂拓克搶掠我等於昨日被伊游騎搶掠得脫
想爾等亦受其害又詢問巴圖爾烏巴什及阿巴

噶斯哈丹游牧踪跡俱在博羅布爾噶蘇阿勒坦
特卜什附近俟三格兵回即飭令進剿等語巴圖
爾烏巴什亟宜殄滅從前成衮扎布等奏稱搶掠
集賽逃往土爾扈特朕即以為斷無是事不過仍
藏僻地俟我撤兵復出耳今兵尚未撤即已肆行
成衮扎布容有不知舒赫德豈未見及此一意苟
且因循急圖歸計乎著速整官兵搜捕務獲計此
際兆惠富德等已擒阿睦爾撒納即乘勝回兵或

尚待哈薩克信息伊二人即留一守候一帶兵到額貝淖爾博羅布爾噶蘇等處成袞扎布等於圍勒奇阿勒坦特卜什等處兩路夾攻自必擒獲或賊衆為兵威所迫逃往阿勒坦額默勒兆惠等酌議傳諭哈薩克派兵堵截將首賊擒獻餘則聽其掠取是否可行著相機辦理

諭叅贊大臣雅爾哈善等擒勦巴圖爾烏巴什及巡查臺站等事宜

上諭軍機大臣曰雅爾哈善等奏稱差往兆惠處賁
送事件之人被瑪哈沁搶掠詢係巴圖爾烏巴什
之人俟三格回兵搜捕等語已傳諭將軍成袞扎
布等會兵進剿矣昨據哈寧阿奏報額林哈畢爾
噶所有瑪哈沁俱已剿滅請巡查兆惠所設臺站
今差員等被賊搶掠更當加意巡查嚴行搜剿以
清臺路雅爾哈善等其往來催督務期擒獲渠魁
併傳諭哈寧阿知之又

諭曰雅爾哈善等奏稱將扎那噶爾布所屬美諾和什等五人解送來京等語美諾和什得勒登巴雅爾東莫俱拏解熱河其額卜克特首擒扎那噶爾布尚可寬宥著押送前來免其拏解

諭定邊右副將軍兆惠等查拏和碩特等逃犯

上諭軍機大臣曰雅爾哈善等奏稱據侍衛雲多克詢問嗎哈沁供詞自己巴里坤逃出之沙克都爾曼濟所屬百餘人渡博羅塔拉河向西逃去又稱杜

爾巴集賽巴蘇海得秦之人商議逃往俄羅斯等語此等賊人雖非首惡而已降復叛未便聽其漏網兆惠等現住俄羅斯邊界即交鄂博什順德訥等留心巡緝併傳諭唐喀祿車木楚克扎布此際如已將哈薩克錫喇擒獲於沿途遇此等賊犯即行查拏

辛未

諭叅贊大臣納穆扎爾等辦給都爾伯特俸銀

上諭軍機大臣曰納穆扎爾等奏都爾伯特汗策凌等告稱伊等應領本年及來歲俸銀可否俱在烏里雅蘇台支領已覆以與例不符等語所辦甚是但策凌等今年初移內地著加恩准其於烏里雅蘇台支給嗣後仍來京請領著諭納穆扎爾等傳諭策凌知之

諭吐魯番貝子額敏和卓辦理進兵事宜

上諭額敏和卓曰據爾奏稱請於明年四月進兵願

從軍自効等語朕已鑒悉至進兵之期三四月俱可又所奏兵數雖亦計出萬全之意但以我兵精銳直抵回城尚不須多為調集爾受恩深重奮勉可嘉即授為領隊大臣於爾所屬派兵一百名在前鋒行走俱照軍營兵丁一例賞給此際宜加慎密不可稍有漏洩

命賞派員拏獲達瑪林之署理定邊左副將軍策布登扎布喀爾喀親王桑寨多爾濟大緞各四端

擒拏解送之齊旺扎卜授為一等台吉賞緞二
端莫尼扎卜賞緞二端銀五十兩

癸酉

定邊右副將軍兆惠等疏奏擊敗哈薩克錫喇
及辦理納木奇等游牧

兆惠等奏言臣等前派圖倫楚帶兵一百名於
和博克薩里等處進剿據報沿途剿殺賊衆收
取馬駝探得哈薩克錫喇在哲克得里克等處

種地於七月初十日至和博克捉生詢問知哈薩克錫喇統衆三百前來遂於阿爾噶凌圖相遇我兵奮力攻擊殺賊百餘哈薩克錫喇敗走以山險馬乏未能追及詢知哈薩克錫喇由戈壁逃往鄂什地方臣等隨派索倫侍衛三達保帶兵前往策應又臣等前派愛隆阿帶兵五百名自己爾楚克至濟爾哈朗接續臺站搜剿賊衆有庫圖齊訥爾阿喇卜占五十餘戶善披領

集賽五十餘戶俱先自投降隨親身投見又於
沙喇博和什嶺前遇都爾伯特納木奇游牧納
木奇遣人乞降旋又逃去我兵追及始行投見
俱解送軍營臣等行文收取伊等器械馬匹據
報善披領屬人即行交出惟納木奇屬人口出
怨言查納木奇受封貝勒職銜伊子車凌烏巴
什為扎薩克台吉從前搶掠臺站隨從阿睦爾
撒納今雖勉強乞降實不可信除將納木奇父

子解京其屬人六百餘俱行勦殺至庫圖齊訥
爾善披領等俱懷叵測亦行文愛隆阿令其續
行辦理奏入報

聞

諭兩路將軍大臣等辦理降人游牧事宜

上諭軍機大臣曰現在兩路收服之厄魯特等甚多
伊等外雖投順多係畏威乞降其心未可全信如
姑息養奸將來必致滋事著傳諭將軍大臣等看

其情形毫無可疑者即移向額林哈畢爾噶等處
指給游牧以備來歲屯田之用如稍懷叵測即移
至巴里坤再令移入肅州即行誅戮朕從前本無
如此辦理之心實因伊等叛服無常不得不除惡
務盡也將軍成衮扎布兆惠等將現在來降之厄
魯特查明具奏分別辦理如應指給游牧即不必
送巴里坤其送至巴里坤者尤須慎重如稍有漏
洩則聞風驚竄地方益難寧謐并傳諭阿里衮黃

廷桂等知之

諭定邊右副將軍兆惠等協勦哈薩克錫喇等事宜
上諭軍機大臣曰圖倫楚途遇哈薩克錫喇以寡敵
衆頗屬奮勉兆惠現在派兵策應亦合機宜昨據
唐喀祿等奏稱前赴塔爾巴噶台此時計已將到
伊等所帶兵丁八百名皆係挑選精壯兆惠等需
用即行調遣追勦哈薩克錫喇但恐狡賊知哈薩
克已降不敢往投或到額林哈畢爾噶等處搶掠

臺站阻截糧運逃入回部亦未可定已傳諭雅爾哈善令派三格前往協同堵截其臺站糧運加意防護不可稍有疎懈

軍機大臣疏奏詢問土爾扈特使臣吹扎卜情形

軍機大臣奏言土爾扈特使臣吹扎卜自藏回京臣等遵

旨詢問吹扎卜爾土爾扈特舊游牧原在何地何故

入於俄羅斯現在游牧與哈薩克何處毗連曾
否爭戰吹扎卜稟稱從前我等游牧與四衛喇
特同居伊犁策妄阿喇布坦時我阿玉奇汗與
彼相惡率屬經由哈薩克往取明噶特因在額
哲勒河游牧與俄羅斯相近俄羅斯即謂我等
為其所屬其實並未歸降我等非奉

大皇帝聖旨及達賴喇嘛之言自不肯為人臣僕從

前

大皇帝遣使為俄羅斯所阻我納木喀格隆被擒者
因我游牧有爭奪之事耳我等現居之地與哈
薩克阿布賚之子努勒蘇勒坦毗連亦有時交
兵等語因告以阿布賚今已歸降遣使奉表朝
夕即至吹扎卜喜云哈薩克既為

大皇帝臣僕若蒙

諭旨令我等由彼前來更不紆迴道路於我等甚屬
有益臣等又向吹扎卜云爾等此來欲請喇嘛

同往適遇達賴喇嘛圓寂未遂所請若

敕召喇嘛與爾等同行則往返需時必難久候此亦
無可如何今

大皇帝憫爾遠來著我等傳

諭撫慰吹扎卜跪

奏云此

大皇帝仁愛之

特恩實不勝感激等語臣等謹將詢問吹扎卜地名

繪圖恭呈

御覽奏入報

聞

甲戌

訓諭定邊將軍成袞扎布等奮勉進剿

上諭軍機大臣曰據成袞扎布等奏稱准雅爾哈善
移文派三格帶兵由額貝淖爾進剿巴圖爾烏巴
什等查軍營現兵一千有餘現在辦理沙喇斯瑪

呼斯克勒特等游牧令滿福照看內移并策應明
瑞俱屬緊要今選兵四百名交由屯旺布多爾濟
搜勦額林哈畢爾噶逸賊其餘兵親自帶往策應
明瑞會合一處於伊犁登努勒台等地方搜勦賊
衆等語已圖爾烏巴什等賊業有踪跡伊等自應
疾速追擒乃遣由屯等帶兵辦理瑪哈沁竟將巴
圖爾烏巴什誘之雅爾哈善意謂一經奏及即責
有所歸顯係舒赫德駕怯取巧直欲脫身事外耳

即如兆惠等勦賊甚多而伊等止擒一尼瑪且係
被北路驅迫有何奮勉効力之處又伊等於勦賊
機宜徃徃含糊覆奏而遇撤兵運糧等事輒條分
縷析此皆舒赫德一意欲歸草率從事今伊等既
由朱爾都斯進勦務將巴圖爾烏巴什擒獲朕看
舒赫德此次効力與否若迄無成功惟伊等是問

乙亥

命釋薩喇爾於獄

上諭軍機大臣曰薩喇爾當厄魯特變亂時觀望畏縮不能奮勇復仇是以降旨拏問但伊曾奏及巴雅爾尼瑪等雖降必叛其言頗驗今巴雅爾等既已生擒扎那噶爾布亦經獻馘哈薩克阿布賚率屬歸誠計阿睦爾撒納自可旦夕俘獲著將此等情節傳諭薩喇爾施恩免罪出獄將從前賞給瑪本特房屋令其居住

命副都統達爾黨阿馳驛前赴木蘭圍場

平定準噶爾方略正編卷四十二

欽定四庫全書

平定準噶爾方略正編卷四十三

乾隆二十二年秋八月己卯

定邊將軍成衮扎布等疏奏明瑞等進剿情形
成衮扎布等奏言臣等自朱爾都斯起程策應
明瑞等八月初三日據明瑞咨報十月初二日
擒獲厄魯特等令其引路越高嶺數處行兩晝
夜至布昆哈瑪爾問知綽和爾等渡庫克烏蘇

糾合昂吉岱都爾伯特烏喇特等盤踞阿圭雅
斯山中伏賊於密林以待因派兵一支截其去
路賊見兵勢即逃我兵尾追至葉克特里克嶺
賊衆依山結寨鎗礮競發遂虛作撤兵之狀有
數百乘馬賊人出寨來追即回馬衝擊鏖戰良
久賊始敗走攻奪一寨至第二寨石峯林立冰
雪堆積馬乏難行不能奪取續接總管溫布來
文帶兵二百五十名前來策應途次聞克勒特

變動即尋蹤至察罕齊老圖遇賊交戰未決勝
負等語隨遣人往取溫布信息暫於明布拉克
駐劄七月二十日夜有賊四百餘圍我軍營我
兵奮力攻擊賊即敗逃追至特克斯而還二十
四日巴圖魯侍衛濟塞布扎奇魯克齊雅瑞等
帶兵二百到營告稱已將克勒特游牧分別順
逆辦理前來策應但馬力亦皆瘦乏計此次勦
賊二百餘奪馬百餘匹所得軍器皆分給兵丁

等語臣等因賊衆盤踞險阻明瑞等暫駐以息馬力是以親往策應相機辦理奏入

上諭軍機大臣曰成衮扎布奏稱衆賊合兵守險明瑞等力不能取等語將軍等自應前往策應但賊衆烏合皆伊等玩忽所致若從前到伊犁時能候賊出入即行勦殺亦不至會於一處矣況伊等前奏昂吉岱係一微末台吉今綽和爾烏喇特人等皆相附和可謂無闕緊要耶明瑞等領隊前行不

能破賊已屬選懦若將軍叅贊親往更難以力弱
自解且有帶去砲位正可攻堅伊等務宜盡勦羣
賊乘勝擒拏巴圖爾烏巴什及搜勦阿巴噶斯哈
丹等游牧勉之勿怠

命叅贊大臣哈達哈自烏里雅蘇台軍營馳驛前赴
熱河

辛巳

定邊右副將軍兆惠等疏奏阿睦爾撒納溺死

信息

兆惠等奏言七月二十九日據順德訥報稱前
在俄羅斯森博羅特圖喇向瑪玉爾等查問阿
睦爾撒納蹤跡取其印文回報仍派委署叅領
額林策等分路搜查今據額林策等來告二十
三日與瑪玉爾相見瑪玉爾云此來甚好適據
齊倫圖喇報稱有步行二人前來向刈草之人
告云我係阿睦爾撒納可報知爾頭目前來渡

我其人即告知喀丕坦遣人操舟前往久未回
報復遣人往看并無蹤跡惟於額爾齊斯河曲
尋獲渡口小舟想係溺死水中今我處多派人
役尋覓尸首等語額林策等復向瑪玉爾索取
文書瑪玉爾因未得實據只以空紙用印付額
林策等回報即派兵十名偵探信息并行文鄂
博什將卡倫兵丁抽調一半存營兵內挑選六
十名前往接應尋覓阿睦爾撒納尸首等語臣

等伏思瑪玉爾雖稱阿逆步行喚渡而後來并無蹤跡未便據以為實自應親往查看阿逆果否溺死或逃入俄羅斯或係他往因遣使哈薩克已逾四旬尚需守候是以臣富德帶兵往會順德訥臣兆惠移兵中路以待兩處信息奏入上諭軍機大臣曰兆惠富德等奏俄羅斯來告有步行二人其一自稱為阿睦爾撒納因遣一人操舟往渡俱無蹤跡等語據俄羅斯所言伊等亦未見

阿逆蹤跡豈可信以為實富德既領兵前往著嚴
密搜查兆惠亦著盡心訪緝仍速催哈薩克擒獻
阿逆詭詐性成必不肯徒步前往即俄羅斯聞來
投之信亦必多遣數人豈有僅遣一人往迎之理
或阿逆遣二人虛作往投使我不向哈薩克查拏
或俄羅斯業已容留飾詞欺我其渡河溺死之語
直屬荒唐即使殞命屬實亦必確有可憑兆惠等
搜查阿逆身死確據尚非切要惟訪伊投入俄羅

斯與否並在各邊界幽僻處搜查當益加奮勉不可輕信浮言心存懈惰倘信為阿睦爾撒納已死而復出滋事伊等自無所辭咎也

申諭定邊將軍成袞扎布等擒勦巴圖爾烏巴什哈薩克錫喇事宜

上諭軍機大臣曰據兆惠等奏順德訥擒獲集賽之厄魯特等供稱巴圖爾烏巴什本年四月前往伊犁及巴什罕沙爾罕等處居住又巴爾達穆特之

厄魯特來告云巴圖爾烏巴什六月間收取我等
游牧往來於勒卜西察罕烏蘇等處聞大兵相近
向伊犁沙喇壁勒而去又據圖倫楚報稱沿途捉
生詢問哈薩克錫喇未曾逃往鄂什由布勒哈齊
向博羅塔拉前往伊犁已行文唐喀祿令其速往
接應等語巴圖爾烏巴什等去向正與成衮扎布
軍行相值自可堵截擒勦但伊等現往特克斯明
布拉克等處接應明瑞等必謂兵少力弱不能兼

辦不知力弱之故皆由伊等急於撤兵今雅爾喀
善等已派三格往勦巴圖爾烏巴什而唐喀祿等
亦接應圖倫楚若兩隊會合兵力自強可傳諭成
衮扎布等將綽和爾昂吉岱等辦理後即前赴伊
犁與三格唐喀祿等協力擒勦不得推諉因循仍
蹈前轍并傳諭雅爾哈善等知之

議奏

恩賞土爾扈特台吉使臣等事宜

軍機大臣奏言土爾扈特台吉敦多卜達什遣使吹扎卜恭請

聖安并

貢方物

皇上加恩賞賚敦多卜達什及其眷屬鍍金器銀器鞍轡緞布茶葉及使臣跟役等緞布茶葉各有差查使臣來時係自備資斧若赴藏歸巢俱官為辦給併伊等貿易物件亦行齎送殊屬勞費

從前賞給使臣銀一百兩跟役等亦賞銀有差
臣等酌議於吹扎卜起程時賞銀二百兩跟役
等共賞銀三百兩自京至張家口俱由驛站供
應自張家口至恰克圖交總管輝色即著來使
自行僱覓騎馱牲隻伏候

諭旨遵照辦理奏入報

聞

虛銜藍翎扎勒藏等解送叛賊阿睦爾撒納之

姪達什策凌三等侍衛額爾登額等解送叛賊
巴雅爾俱於木蘭

行在審明正法

乙酉

諭都統滿福巡查烏納哈特等臺站

上諭軍機大臣曰成衮扎布等奏稱現在由阿勒輝
衮西喇至烏納哈特嶺口設臺站一十三處山谿
險阻恐有瑪哈沁藏匿應派滿福帶兵三百名於

烏納哈特等站來往巡查等語朕昨傳諭滿福往額林哈畢爾噶一路巡查著照成衮扎布等所指臺站往來搜緝務將藏匿瑪哈沁等盡行勦殺以清道路即遵諭速行

參贊大臣雅爾哈善等疏奏端濟布等勦賊情形

雅爾哈善等奏言端濟布奎瑪岱等招服台吉達瓦等戶口仍帶兵前追巴哈曼集等七月十

四日至克伯訥克圖嶺捉生詢問知巴哈曼集等在瑪納斯河源之小衛和勒晶居住隨帶兵追入遇從前搶掠臺站之賊人扎木布游牧勦賊五十餘人生擒扎木布又遣人招降巴哈曼集屬人有得木齊瑪勒占等率二百餘戶來降據稱巴哈曼集帶百餘戶越大衛和勒晶嶺逃遁端濟布留駐管束新降戶口派新降之瑪勒占等隨總管布喇勒圖往追奎瑪岱於十九日

續進至大衛和勒品有賊四十餘人立寨甚固
乘夜攻奪賊皆逃散過嶺即朱爾都斯地方以
馬乏不能窮追沿途勦殺餘賊回至濟爾哈朗
軍營查扎木布曾搶掠巴罕庫蘇臺站應即行
正法其瑪勒占等十得木齊戶口俟內移時分
別辦理奏入報

聞

諭兩路將軍大臣等撤兵事宜

上諭軍機大臣曰兆惠等所奏逆賊阿睦爾撒納身
死信息諒非真實計我遣往哈薩克之額爾克沙
喇努三等此際已回至軍營自有確信如仍未擒
獲阿逆天氣漸寒應先將哈薩克錫喇巴圖爾烏
巴什鄂哲特阿巴噶斯哈丹等游牧辦理俾伊犁
等處寧靜則來年更易於集事如此等賊衆業經
辦理或撤兵回濟爾哈朗或額林哈畢爾噶過冬
著傳諭兩路將軍大臣等定議具奏議定後兆惠

可遣人往告阿布賚云我兵久駐爾界恐爾屬人
驚疑是以大皇帝命我等撤兵爾等若將阿逆擒
獻即速為奏聞自有重賞於歸途之便正可剿除
諸賊現在成衮扎布等既帶兵前往雅爾哈善又
遣三格等追截則以三路兵辦此數賊斷無不獲
之理然必待獲賊始可撤兵不得因有此旨遂亟
圖休息也

丁亥

宣諭達爾黨阿哈達哈罪狀

上諭大學士曰去歲擒勦逆賊阿睦爾撒納進兵至
哈薩克西路以達爾黨阿為將軍北路以哈達哈
為將軍伊等既未能擒獲阿逆又致阿布賚脫逃
本應治罪朕意伊等未必有心僨事不過為賊所
愚路遠遲誤之所致是以從寬免其處分後經詢
問自軍營回之侍衛官員則咸稱達爾黨阿追阿
逆時相距僅一二里逆賊不及馱載反遣人託為

哈薩克本欲擒獻阿睦爾撒納惟待其汗阿布賚至即便送來達爾黨阿墮其計中崙候擒獻並不督兵追捕且下令不許衆兵前進直至逆賊捆載脫逃後方遣兵追逐哈達哈則路遇阿布賚既經後隊官兵呈報並不勒兵追捕至阿布賚逃去始尾追一次以塞其責衆奏僉同是達爾黨阿哈達哈之急玩愒事顯然可見因將伊等公爵革去降秩示譴今訊問拏獲阿逆之姪達什策凌等供稱

阿睦爾撒納於去歲九月下旬自敗走地方潛回
又據尼瑪供稱去歲大兵追及阿睦爾撒納我催
促進勦將軍等等候阿布賚擒獻以致脫逃再阿
布賚對面安營我兵亦並不迎敵直至逃去始行
追逐旋即撤兵等語與侍衛等所奏脗合觀此則
伊二人不能用朕奮勇之官兵且為逆賊等所輕
視矣達爾黨阿哈達哈俱勲舊子孫受恩襲爵乃
身為將軍專任討賊而因循觀望坐失事機若此

實出情理之外且去歲撤兵時伊等奏稱我兵距
逆賊逃竄之地速行亦需月餘今於九月初撤兵
自葉什勒椿集行五十餘日至巴顏鄂拉南之哈
薩拉克地方等語今據達什策凌等所供阿睦爾
撒納聞大兵既撤於九月下旬回至葉什勒椿集
行二十餘日至巴顏鄂拉又十五日抵哈薩拉克
東之額布根塔爾琿地方共五十餘日等語設果
如伊等所奏有月餘程途則阿逆復回必須兩三

月且阿逆必確知撤兵之信方敢起程果與我兵相去月餘往返探聽又必三四月矣乃我兵則於九月初撤回行五十餘日始至哈薩拉克而阿逆即自九月盡起程至額布根塔爾琿亦祇五十餘日何以如此之速耶則其被賊所欺愈為顯著觀阿逆今春即到額林哈畢爾噶地方此即伊等因循推諉之明証也况今歲阿布賚遇我兵三十餘人一戰即降則去歲若稍奮勉阿布賚早已投

誠將逆賊擒獻矣又伊等擁兵觀望之明証也再
兩路官兵會合後自應聯為一體乃伊等竟於相
見之次日即分營行走第三日即議及撤兵有是
理乎伊等即協力追擒尚未知獲賊與否況復自
分彼此安能集事且如逆賊兔脫時伊等俱係將
軍若肯親行豈不勝於叅贊大臣乃伊二人並不
前往止遣阿里衮一人領兵追逐不知將軍所司
何事達爾黨阿哈達哈如此種種貽誤若不加罪

譴則國家之賞罰何在本當以軍法從事但達爾
黨阿本一糊塗無能之人為賊所愚而哈達哈每
圖安逸遇事因循尚非出於有心然既悞用於前
復姑容於後此即朕之咎也伊等身為將軍且係
勲舊子孫似此坐失機宜玷辱滿洲更何顏覲列
班聯達爾黨阿哈達哈俱著革職發往熱河披甲
効力

九月壬辰

命議叙副都統愛隆阿所領勦賊官兵等

上諭軍機大臣曰據兆惠奏稱副都統愛隆阿等勦
殺納木奇等賊衆一千餘將任事官兵分別功次
具報等語此次官兵等進勦賊衆頗屬奮勉著加
恩將驍騎校拉瑪錫授為三等侍衛領催額勒濟
圖授為藍翎侍衛厄魯特三等侍衛達爾漢授為
二等侍衛賜號哈什哈巴圖魯賞銀一百兩其餘
有功官兵及陣亡得傷者俱著查明報部照例議

叙議卹

申諭將軍大臣進勦伊犁賊黨事宜

上諭軍機大臣曰兆惠奏稱現在駐兵巴雅爾郭勒
候遣往哈薩克使臣回營并富德處所探阿睦爾
撒納確信或分兵過博羅塔拉與永貴會合或前
赴成衮扎布軍營等語是兆惠之兵尚需守候不
能即往額林哈畢爾噶恐咨行成衮扎布後舒赫
德即藉此不往伊犁則進勦賊人責當誰屬著傳

諭成衮扎布舒赫德速領兵前抵伊犁務將巴圖爾烏巴什哈薩克錫喇昂吉岱鄂哲特等嚴行查拏以期地方寧謐毋得藉端推諉即著作速回奏命議處叅贊大臣唐喀祿

上諭軍機大臣曰兆惠所奏唐喀祿等咨報選兵三百名交瑚爾起令其進剿其餘兵即行撤回等語唐喀祿等係特派擒剿哈薩克錫喇之人今到塔爾巴噶台等處已得賊人信息輒將兵撤回殊屬

乖謬伊等即謂馬疲糧竭或赴兆惠軍營或雅爾
哈善所駐濟爾哈朗軍營俱可接濟豈伊等自以
為北路之兵遂不相聯絡耶唐喀祿著交部嚴加
議處車木楚克扎布從寬免其交議至唐喀祿等
撤回兆惠已經具奏而伊尚未奏到者是又必自
分彼此仍由北路具奏以致遲滯耳伊等既經撤
兵此旨亦不必連遞著納穆扎爾暫存俟唐喀祿
到日交發

命豫派官兵伴送哈薩克使臣等

上諭軍機大臣曰哈薩克使臣等由北路前來將至
行在若照常由西路遣回正屆我撤兵之期沿途
恐有疎失著由烏里雅蘇台過索勒畢烏拉克沁
嶺自額爾齊斯塔爾巴噶台送至古爾班察爾回
伊游牧派散秩大臣和碩齊侍衛富錫爾穆倫保
等帶索倫兵一百名厄魯特兵一百名沿途伴送
使臣搜勦瑪哈沁等可傳諭成衮扎布等交科卜

多駐劄大臣派索倫兵豫備厄魯特兵著和碩齊
先往揀派其馬駝牲隻及整裝銀兩俱照例賞給
諭定邊將軍成衮扎布等辦理綽羅斯逸賊

上諭軍機大臣曰昨詢問尼瑪現在藏匿之綽羅斯
台吉等據供尚有昂吉岱薩木丕勒諾爾布特古
斯孟克尼瑪諾顏哈什哈納喀達等五人著傳諭
成衮扎布等進勦哈薩克錫喇等賊衆時將尼瑪
所供五人留心查拏解京此外如有綽羅斯之人

亦照此辦理

護軍校鄂畢達以擒獲輝特台吉巴泰吹扎卜

授三等侍衛

癸巳

定邊將軍成衮扎布等疏奏進剿賊衆情形

成衮扎布等奏言臣等帶兵接應明瑞派副都統由屯侍衛老格等分路剿殺瑪哈沁據由屯等報稱克勒特種地賊人間我兵過巴罕納喇

特嶺即逃向哈什八月初八日追至圖爾根河
遇賊力戰勦殺收楞額博索庫勒等一百餘人
收其妻子器械初十日營長伊靈阿索音達爾
勦殺塔里雅圖口百餘人察克瑪河口賊四十
餘人又侍衛老格報稱初九日至濟爾哈朗河
勦殺烏魯特七戶四十餘人初十日至博多美
和羅勦殺克勒特一百五十餘人收其馬駝牛
隻又遣取明瑞信息之侍衛海林泰於庫哲圖

地方遇賊二十人殺賊三人奪馬四十匹臣等
仍令海林泰帶兵一百名巡查烏納哈特嶺各
臺站十三日明瑞等咨報我等至特克斯因馬
匹疲乏暫駐口糧已罄搜取綽和爾所種地畝
勦殺瑪哈沁三百餘人侍衛濟塞布追獲綽和
爾五十餘人收其牛羊詢問賊人所守阿圭雅
斯營壘俱已棄去或往察罕烏蘇或往沙喇擘
勒等語臣等即尋蹤前往堵截又准兆惠咨稱

巴圖爾烏巴什已往沙喇犛勒等語沙喇犛勒距特克斯程期半月或阿巴噶斯哈丹賊人及綽和爾烏喇特昂吉岱等賊俱與巴圖爾烏巴什會合臣等竭力前往辦理奏入

上諭軍機大臣曰據成衮扎布等所奏綽和爾等賊人與巴圖爾烏巴什等在沙喇犛勒會合必至滋生事端自當奮勉勦殺何得以官兵馬力為詞伊等從前於克勒特烏魯特等鄂拓克人衆若早為

殄滅收其牲隻即進勦巴圖爾烏巴什計已奏功
乃惟務姑息安撫以致賊衆會合始覺辦理之難
其何所歸咎且明瑞等雖經進勦總未追及賊人
成衮扎布等何以並無一語叅奏賞罰不明誰肯
用命著伊等回奏

甲午

哈薩克阿布賚使臣亨集噶爾烏穆爾台都楞
阿蘭扎阿布賚之弟阿布勒比斯使臣塔納錫

拜克奈奉表入

覲於布扈圖口

上御行殿

召見亨集噶爾等行禮

溫語詢問隨

賜宴於行營

申諭叅贊大臣雅爾哈善等進勦阿巴噶斯哈丹游

牧

上諭軍機大臣曰昨據雅爾哈善等奏稱阿巴噶斯
哈丹游牧賊衆逃往烏固勒扎登努勒台等處已
調副都統三格等接應侍衛納呼德等語朕諭以
賊衆必會合一處須協力勦除亦已傳諭成衮扎
布等矣此際三格等曾否將阿巴噶斯哈丹賊衆
追及勦除及先後派出官兵勦賊情形著雅爾哈
善等確查具奏

乙未

命哈薩克使臣亨集噶爾等隨從行圍

命革侍郎副都統唐喀祿職以藍翎侍衛効力

上諭軍機大臣曰據唐喀祿等奏稱准兆惠調兵接
應圖倫楚已派瑚爾起帶兵三百名前往惟是兵
丁口糧不敷馬力疲乏路遠難於接濟不能忍餓
步行今準噶爾全部已定阿睦爾撒納又溺水身
死哈薩克錫喇必被西路大兵擒獲請遵前旨撤
兵再臣等從前即應撤兵乃專意擒取阿睦爾撒

納遠至塔爾巴噶台以致兵馬疲乏請交部治罪等語昨兆惠奏唐喀祿有一面具奏一面撤兵之報朕已將唐喀祿交部察議今覽伊奏以勉強前行請罪朕屢諭伊等追擒哈薩克錫喇何嘗令其撤兵即有豫籌撤兵之語亦謂交辦事竣之後耳豈現諭擒賊而即令撤兵耶唐喀祿若但歸咎於口糧馬力將兵撤回不過交部議處乃竟以遵旨撤兵飾詞取巧視朕為何如主僅予議處不足示

懲著革去侍郎副都統銜降為藍翎侍衛交納
穆扎爾差遣効力車木楚克扎布仍著從寬免其

交部

虛銜藍翎愛普薩以解送達什策凌齊巴罕巴

泰吹扎卜

授三等侍衛

戊戌

駐劄巴里坤辦事大臣阿里衮等疏奏沙喇斯

瑪呼斯等游牧逃叛情形

阿里哀等奏言侍衛寧古里等報稱克勒特沙
喇斯瑪呼斯三游牧內移因路狹難以同行令
沙喇斯瑪呼斯人衆暫住察罕通等處八月二
十一日據將軍等遣來督催之瑪呼斯得木齊
達什敦多卜遣什長博多羅克等告稱沙喇斯
得木齊都噶爾丹巴鄂齊爾恩克錫瑪呼斯得
木齊肯哲收楞額普爾普等復叛搶掠三都克

游牧殺其甥達瓦恩克勒圖及得木齊登德賀
自察罕通帶領游牧過海都河因水勢甚大遂
由喀喇呼珠至烏蘭和屯欲會合昂吉岱等賊
衆等語查將軍等前令都統滿福照管此三游
牧今滿福帶兵巡查臺站若由阿勒輝追勦相
去甚近因遣博多羅克前往報知又據博多羅
克告稱沙喇斯収楞額巴雅爾係都噶爾之婿
業經拏獲交克勒特總管根達什看守等語奏

入報

間

叅贊大臣雅爾哈善等疏奏琿齊額林沁達瓦等逃叛情形

雅爾哈善等奏言前因呼爾瑞台吉達瓦布魯古特台吉琿齊等殺扎那噶爾布獻馘來降據總管端濟布報知達瓦出痘身故琿齊等已遣人招降額林沁達瓦等語七月二十七日三格

等回至濟爾哈朗軍營告稱途遇琿齊額林沁達瓦之得木齊巴朗庫里因恐游牧內移遇別隊官兵勦殺請給文為據臣等即給以文書令箭一面令三格前往博羅布爾噶蘇等處擒勦巴圖爾烏巴什等閱今日久琿齊等未見前來據端濟布等來至軍營告稱我等前追巴哈曼集一面遣委署驍騎校達什敦多卜前往督催琿齊等游牧內移今達什敦多卜稟稱琿齊遣

人同至額林沁達瓦游牧定於日內遷移忽伊
屬人報知大兵將到額林沁達瓦大恐令我往
見領隊大臣三格隨將游牧移動因告以大兵
已知爾等歸降斷不殺害伊等不信將我綁縛
步行隨至哈什河口其夜得脫賊衆已向朱爾
都斯逃去等語奏入

上諭軍機大臣曰據雅爾哈善等奏稱琿齊額林沁
達瓦復叛已行文將軍辦理等語厄魯特奸狡性

成反覆無定初降之時辦理必須妥協即如三格等進勦額林沁達瓦因端濟布告知業經招降即行撤兵原屬率易著傳諭雅爾哈善將端濟布等從前如何招服琿齊額林沁達瓦之處查明具奏仍速催三格等將巴圖爾烏巴什阿巴噶斯哈丹游牧賊衆奮力擒勦毋得玩忽從事

申諭兩路將軍大臣辦理進勦事宜

上諭軍機大臣曰據阿里哀等奏沙喇斯瑪呼斯游

牧雅爾哈善等奏琿齊額林沁達瓦游牧俱已降
復叛看來此等賊人心懷叵測招降斷不可恃總
以嚴行勦殺為要但此等皆么麼小醜用兵之道
莫要於殲厥渠魁此時惟擒勦巴圖爾烏巴什哈
薩克錫喇等當以全師制勝不可分兵搜緝俟渠
魁既獲再以餘力舉之自難逃於天網矣著傳諭
兩路將軍大臣等知之

諭駐劄巴里坤辦事大臣阿里衮等辦理降人游牧

上諭軍機大臣曰阿里衮等奏稱沙喇斯瑪呼斯游牧叛逃已傳諭滿福令其作速帶兵擒勦並諭將軍成衮扎布兆惠等軍行所至嚴行勦殺勿以姑息養奸著傳諭阿里衮如有移至巴里坤賊衆即遵前旨送往肅州辦理再雅爾哈善奏稱達瓦之弟鄂爾奇達遜已送往巴里坤等語俟其到日即著解送來京

己亥

訓諭兩路將軍大臣豫籌撤兵等事宜

上諭軍機大臣曰兆惠奏稱遣往哈薩克之額爾克沙喇等尚未回營哈薩克阿布賚初次所遣使人已往見成袞扎布俟歸途之便再遣使恭齎勅書賜物同往等語計哈薩克使人歸日額爾克沙喇等亦已到來自可得阿逆信息惟成袞扎布等進勦巴圖爾烏巴什等賊未必即能完結若遽撤兵回巴里坤過冬則來歲進兵又煩跋涉或酌於濟

爾哈朗額林哈畢爾噶等處駐劄其安設臺站接
濟口糧馬匹均須豫為籌畫著將軍大臣等定議
具奏至成袞扎布數年未曾來京請訓舒赫德雖
面受訓旨而臨事懦弱不能協同辦理以致茫無
端緒著成袞扎布兆惠富德於撤兵後來京籌辦
一切機宜博爾奔察年邁亦著同來其軍營事務
交雅爾哈善總理再此次領隊大臣內三格額爾
登額未有勞績而三格從前看字尼瑪竟致脫逃

將軍叅贊等即應記過俟其立功自贖以昭賞罰
即如色布騰巴爾珠爾往擒吞圖布未獲又不窮
追經朕詢問成哀扎布等久未回奏又明瑞從前
進勦阿巴噶斯哈丹游牧此次色布騰巴爾珠爾
進勦克勒特等賊衆屢致脫逃亦當議罪而色布
騰巴爾珠爾較明瑞為重但伊等初履行間將軍
叅贊調遣乖方亦不為無過况領兵勦賊將軍自
當親行即有應行調遣者叅贊亦宜前往鄂實即

叅贊大臣也伊於軍前事務宜奮勉効力至繕寫
章奏諒皆舒赫德與成袞扎布商辦非鄂實所能
則伊所司何事著將此等情節俱各登記俟成袞
扎布等到時察議其功罪不相抵者即行叅奏
諭定邊右副將軍兆惠接應瑚爾起兵丁馬匹

上諭軍機大臣曰昨唐喀祿派瑚爾起帶兵三百名
接應圖倫楚進剿哈薩克錫喇若能與三格等會
合更可協力剿賊但唐喀祿派往時即告以酌量

馬力所能不便使兵丁步行追緝恐瑚爾起因有
此言不復努力前追藉口糧盡馬乏帶兵即回亦
未可定著傳諭兆惠如瑚爾起已與圖倫楚三格
等相會即令其併隊行走如馬力疲乏通融辦給
不得以北路所派兵丁稍分畛域不行接濟

庚子

都統滿福疏奏接續阿勒輝等臺站

滿福奏言臣於八月十三日自吐魯番起程巡

查臺站二十日侍衛羅卜藏等遣人報稱於十
九日阿勒輝嶺之西有賊人百餘搶掠臺站二
十二日侍衛寧古里報稱沙喇斯瑪呼斯游牧
逃叛二十三日阿勒輝博多克臺站筆帖式富
桑阿呈報遞送奏匣公文之兵丁告稱遇賊搶
掠臺站筆帖式五達色綠旗兵三名察哈爾兵
二名俱中鎗身死等語即帶兵往查問係沙喇
斯等賊衆臣即於二十六日到阿勒輝臺站查

看賊人蹤跡進南山谷口與沙喇斯等所住察
罕通相對復查所送事件惟遺失八月初五日
自京遞送定邊將軍奏匣一面報明軍機處補
送將所帶兵丁補足臺站仍查各臺站有無失事
辦理接續再行帶兵追勦賊衆奏入

上諭軍機大臣曰沙喇斯瑪呼斯等游牧已降復叛
搶掠臺站滿福間報自應量留兵馬交筆帖式等
查看接續一面帶兵速追庶賊衆不至遠颺乃欲

俟辦理臺站事竣然後往追則賊衆豈能坐待擒戮著滿福即帶兵速往追勦勿更怠忽從事再賊衆或詐稱往烏蘭和通仍回哈喇沙爾亦未可定哈喇沙爾與吐魯番相近併傳諭額敏和卓遣人偵探如賊衆到彼即派兵同閭相師綠旗兵迅往掩襲相機辦理又

諭曰沙喇斯瑪呼斯等逃叛已傳諭將軍大臣等矣今滿福奏臺站被搶將軍成衮扎布等在賊之前

一得賊人蹤跡即當奮力遮擊數日以來軍營奏
事何以未到其八月初五日傳諭成衮扎布等擒
勦巴圖爾烏巴什之旨及所批伊等奏摺既經遺
失著抄錄補寄

壬寅

授都爾伯特台吉布圖庫班珠爾為二等台吉布林
為四等台吉各賜衣一襲

命以叛賊尼瑪及其子衮楚克車凌於故將軍和起

墓前俱即行凌遲正法

平定準噶爾方略正編卷四十三

欽定四庫全書

平定準噶爾方略正編卷四十四

乾隆二十二年秋九月丙午

命革駐防將軍錫特庫職留巴里坤披甲効力

上諭軍機大臣曰阿里衮奏稱鹽池臺站被賊竊取
馬駝拒捕傷死兵丁因患病未汗遣總兵官丑達
前往查拏等語鹽池去巴里坤甚遠有何盜賊不
過嗎哈沁之類乘間偷竊驛馬耳阿里衮既患病

不能前往錫特庫豆斌德舒所司何事此三人內
錫特庫理應率先奮往豆斌身任提督且有綠旗
兵丁德舒為滿洲臣僕年力壯盛俱應奮勉乃伊
三人退縮不前只令丑達前去是何意見若謂在
巴里坤辦事亦不過阿里衮一人耳伊等又何嘗
辦事耶錫特庫曾任將軍遇事怯懦更屬不堪著
革職自備資斧留巴里坤披甲効力豆斌德舒俱
著交部嚴加議處

諭定邊將軍成袞扎布等辦理臺站事宜

工諭軍機大臣曰據雅爾哈善等奏稱濟爾哈朗軍營至烏魯木齊等處臺站所有嗎哈沁賊人盡皆勒殺仍捉生詢問尋踪追緝以靖地方等語辦理頗屬妥協著將伊等奏摺錄寄成袞扎布等查照辦理併傳諭阿里袞知之

丁未

以副都統三格追勦賊人情節

諭兩路將軍等核定功罪

上諭軍機大臣曰前因永貴所奏三格追勦扎那噶爾布尼瑪等呈報賊衆潛逃情節反在將軍奏報之後恐三格有諱飾情事復諭永貴查奏今據永貴奏稱五六月間三格陸續報知河水甚大不能進發欲出山尋路至哈什等處擒勦而伊以道里遙遠令俟水落前往賊已潛逃至奏報遲延因往返商酌未定故在烏爾登所報之後等語是三格

等不過聽伊調遣尚無大咎著將此等情節傳諭
兩路將軍俟撤兵時分別功罪察議具奏

戊申

厄魯特額卜克特以擒拏扎那噶爾布

授藍翎侍衛在上駟院行走賞銀三十兩

以中秋正法情節傳

諭軍前侍衛官員

上諭軍機大臣曰前成衮扎布等奏中秋報稱解送

之諾諾錫渡河欲逃因以刀刺落水中等語曾經
傳諭查奏昨詢問來京侍衛據稱臺站人等俱云
中秋撒袋馬匹俱為賊搶去逃走今中秋解到時
仍執前說及詰以侍衛等所告遂俯首無辭諾諾
錫原非要犯若中秋據實供出或可從寬乃巧詞
欺隱自難姑貸因將中秋正法著成袞扎布傳諭
軍前侍衛官員人等知之

已酉

定邊右副將軍兆惠疏奏逆賊阿睦爾撒納逃
入俄羅斯

兆惠奏言據叅贊大臣富德咨稱八月初一日
至森博羅特十二日遇副都統鄂博什告稱沿
河尋覓逆賊阿睦爾撒納尸首未獲因向陸路
各卡倫查看十四日侍衛順德訥回營酌議遣
人告知俄羅斯瑪玉爾等約於十五日在額爾
齊斯河相會是日瑪玉爾等具舟來迎恭請

聖安後告以順德訥所報齊倫圖喇人等遇見阿睦
爾撒納之說因爾等報知溺死是以領兵尋覓
今全無踪跡自屬荒唐從前與爾國定議不匿
逃人且阿逆更與尋常逃犯不同溺死既無實
據自難回奏此等情節爾等應亦聞知瑪玉爾
等惟以溺死固屬未確但現在並無信息若果
聞知自必往軍營知會等語支吾推諉續據索
倫委署章京噶布舒塔尼布告稱在森博羅特

卡倫遇厄魯特伊宛告稱七月初旬見阿睦爾
撒納帶領八人步行至俄羅斯被刈草人擒獲
我因認識阿睦爾撒納前去觀看阿睦爾撒納
問我為誰答以達瓦齊屬人阿睦爾撒納遂入
瑪玉爾室內是夜即送往察罕汗處其八人又
於次日解送等語因將伊宛帶至軍營再三詰
問據稱阿睦爾撒納原與達瓦齊同逃往哈薩
克是以熟識瑪玉爾因伊察罕汗未經發落故

詐稱溺死等語核其情節與哈薩克來使所言
七月十九日阿逆步行逃出之語相符又與自
哈薩克逃來之厄魯特達瓦所供亦合因公同
商議若即據伊宛之言向彼索取恐瑪玉爾以
前言為愧欲行對質致啟釁端仍令順德訥往
告瑪玉爾云我等暫遣人往哈薩克取信若阿
逆不在彼處或告知實入爾國自當遵定議給
還隨將兵丁交鄂博什照舊駐候我同順德訥

願往見察罕汗以理索取祈即具奏請

旨等語二十六日臣與富德順德訥同問伊宛仍如
前說且謂哈薩克若拏送阿逆前來甘受妄言
之罪等語臣等伏思阿逆逃入俄羅斯事屬確
實想俄羅斯以定議為重自應送還但行文薩
納特衙門及差遣使臣之處向有成例伏候
訓示謹將厄魯特伊宛達瓦由驛送京以備詢問奏
入

工諭軍機大臣曰從前兆惠等奏稱逆賊阿睦爾撒
納渡河溺死朕即以為非實今果竄入俄羅斯已
命理藩院行文索取兆惠等亦不必刻期辦理但
令順德訥往告瑪玉爾云現據哈薩克報稱阿睦
爾撒納帶領八人逃入爾國爾等自非有意隱匿
必因送至爾察罕汗處不敢自專從前我等以阿
逆溺死奏知大皇帝大皇帝早已洞鑒即命行文
爾薩納特衙門索取爾察罕汗念兩國和好必循

舊約送還我等亦不復在此尋訪已遵旨撤兵矣
如此曉示後即撤兵回至大營現在擒勦巴圖爾
烏巴什哈薩克錫喇等最為切要近聞巴圖爾烏
巴什有逃入哈薩克之信是兆惠等歸途正可相
遇而成衮扎布又已尾追自可擒獲獲此數賊後
已屆冬令即未能盡勦亦不妨於明春辦理即遵
前旨酌定駐兵之地成衮扎布兆惠富德等來京
請訓此時俄羅斯能將阿逆擒送固善否則且俟

來年平定回部後若俄羅斯果以阿逆居奇或有
異志亦當先除近患然後相機辦理惟哈薩克若
遣使來即可告以阿逆逃竄情形倘俄羅斯隱匿
不還則阿逆懷爾等擒拏之怨必將煽惑報復因
爾我一家故相告語或因便作書曉示亦可併傳
諭成衮扎布等知之又

諭曰前兆惠等擒獲巴雅爾時圖倫楚達禮善俱領
隊催督著有勞績因飛章入告未經詳述今奏請

應否邀恩議敘圖倫楚達禮善既經奮勉効力著
加恩交部議敘

命恩卹總管巴寧阿并

訓諭副都統三格等

上諭軍機大臣曰雅爾哈善奏據三格報稱察哈爾
總管巴寧阿等於博羅齊地方捉生詢問三十里
外有賊人十戶入山搜勦遇伏陣亡等語總管巴
寧阿三等侍衛努呼德阿拉善二等台吉達瓦車

林奮勇勦賊歿於王事深可憫惻著交部照例議卹三格等聞信即帶兵接應勦賊百餘人尚與惟怯不前者有間但所報擒獲琿齊屬人俱稱琿齊額林沁達瓦往伊犁合阿巴噶斯哈丹游牧見河岸有二大營恐係大兵及哈薩克兵因逃回此地三格即遣人到彼查看皆厄魯特踪跡移去已十餘日等語伊犁之營既係厄魯特則琿齊等何以逃回三格聞信自應親身前往何以僅遣人查看

甚屬疎懈著雅爾哈善傳諭三格等仍作速追勦
琿齊等賊為巴寧阿等復讐又

諭曰雅爾哈善據三格報稱賊人夤夜劫營時有兵
丁八人逃去等語續有四人回至濟爾哈朗軍營
詐稱迷路雅爾哈善即行研訊正法所辦甚是其
在逃四人或再投回或被拏獲亦即取供正法以
肅軍紀

命解送厄魯特宰桑烏魯木來京

上諭軍機大臣曰雅爾哈善奏稱副都統愛隆阿在
察罕烏蘇收取宰桑烏魯木游牧百餘戶情願內
移等語著將烏魯木解送來京

已酉

以蘇章阿治罪情節

諭察哈爾正黃旗總管巴爾品

上諭軍機大臣曰前因伯格里之妻請將游牧內移
派蘇章阿照管昨據副將軍等叅奏蘇章阿偏護

伯格里之妻肆行無恥已將蘇章阿治罪伯格里之妻係厄魯特婦人無足深責伊若聞將蘇章阿治罪必生疑畏著傳諭巴爾品密為防範不必宣露

庚戌

命恩卹副都統阿敏道等

上諭軍機大臣曰從前將軍兆惠等駐劄伊犁遣副都統阿敏道領索倫厄魯特兵收服波羅泥都霍

集占等伊等詐稱畏厄魯特擾害若肯撤回即行
投順阿敏道遂撤回厄魯特兵帶索倫兵一百前
往今據總管五十六等報稱到沙喇斯游牧聞波
羅泥都等謀叛阿敏道及兵丁百人俱為所害等
語阿敏道雖為叛賊等所愚究屬捐軀殉難深可
憫惻著同隨行官兵俱照陣亡之例交部議卹

諭署理定邊左副將軍印務策布登扎布等防範阿
睦爾撒納事宜

上諭軍機大臣曰兆惠奏稱逆賊阿睦爾撒納逃入
俄羅斯屬實現在行文索取前聞烏梁海郭勒卓
輝等俱逃入俄羅斯或被阿逆煽誘致擾我歸順
之烏梁海亦未可定著傳諭策布登扎布納穆扎
爾等曉示察達克加意防範若有賊人聲息如量
力不能擒斃即報知布延圖或烏里雅蘇台軍營
發兵協助但宜密為豫備不必稍涉張皇致烏梁
海等驚恐

甲寅

諭駐劄巴里坤辦事大臣阿里衮接續臺站事宜

上諭軍機大臣曰近因鹽池臺站被盜阿里衮患病未曾親往查拏此時想已全愈朕昨命滿福接續朱爾都斯臺站恐伊不能辦理著阿里衮帶兵二百名合丑達之兵接續臺站現在交送成衮扎布事件著阿里衮帶往若所到之處臺路已通即將事件遞送軍營仍回巴里坤辦事至侍衛寧古里

所報沙喇斯瑪呼斯等逃叛現在信息如何著查
明奏聞

命免治察哈爾總管端濟布罪

上諭軍機大臣曰端濟布奏稱在羅克倫孟古圖嶺
收獲噶爾藏多爾濟宰桑羅卜扎尼瑪得木齊敦
多克等將造言惑衆之古隆格瑪木特正法其戶
口什物牲畜交送巴里坤羅卜扎等送出噶爾藏
多爾濟之幼女派伊屬人照管送京等語端濟布

此次所辦尚合機宜從前端濟布招降瑄齊達瓦
惟事姑息以致復叛朕已命兆惠等查明治罪今
功過相抵著加恩寬免併傳諭兆惠等知之

諭定邊將軍成袞扎布等奏報勦賊情形

工諭軍機大臣曰成袞扎布等自初四日以來未有
奏報朕昨已降旨詢問想因臺站尚有阻滯深為
廕念現命阿里袞帶兵接續臺站即將諭旨交令
馳送此時計臺路已通奏報無誤所有進勦巴圖

爾烏巴什等賊衆情形作速奏聞

乙卯

諭署理定邊左副將軍印務策布登扎布等查拏搶劫侍衛之喇嘛羅卜藏阿喇卜珠爾等

工諭軍機大臣曰策布登扎布奏稱去年喀爾喀盜竊生事之時塔爾拉克沁卡倫二等侍衛卓勒和等被傷身死已拏獲為從之恩克等九人供出為首起意之托音喇嘛羅卜藏阿喇卜珠爾等四人

現在嚴行查拏等語喇嘛等起意劫奪傷死侍衛
罪不可逭著策布登扎布等務即擒獲正法併傳
諭桑寨多爾濟派伊親信人員於庫倫等處密行
查拏勿令逃脫

諭定邊將軍成衮扎布體察降人三都克情形

上諭軍機大臣曰沙喇斯宰桑三都克在軍營頗為
出力今伊游牧內移為得木齊都噶爾等所掠殊
屬可憫著賞銀一百兩成衮扎布撤兵後即隨帶

來京伊妻子若未被掠亦著續送此際三都克若
顧戀游牧心懷叵測自當豫為體察如照常行走
即加以撫慰

命解送青海卡倫拏獲之厄魯特伊什克及其家口

來京

丙辰

命以阿逆逃入俄羅斯情形宣示中外

上諭大學士日前兆惠富德奏稱俄羅斯頭目瑪玉

爾告稱有步行二人至伊齊倫圖喇自稱為阿睦
爾撒納及遣人迎渡並未回報續往看視止見渡
口小船泊於河灣必俱溺死水中等語朕彼時即
不以為然當經傳諭兆惠等謂溺死之語不可信
逆賊阿睦爾撒納奸詭狡詐非俄羅斯為所蠱惑
背約私留即阿睦爾撒納設為溺死之說冀圖緩
我追兵潛逃他處順德訥等不可輕信傳言沿河
尋覓今據奏到行至森博羅特卡倫所遇諸人詳

加訪問始知渡河溺死事屬子虛果不出朕之所料然則順德訥等率領官兵在額爾齊斯河尋覓十餘日之久如此舉動豈不為俄羅斯所笑乎準噶爾已經平定反側之諸厄魯特或捕獲正法或患病身死惟逆賊阿睦爾撒納實為悖逆之渠魁既不早投天網又未遽伏冥誅坐使其視息偷生遊魂遠竄將來自不能久甘窮困勢必滋生事端為患邊境是逆賊一日不獲西陲之事一日不能

告竣揆之事理實有不能中止之勢但時屆寒冬
士馬亦宜休息已有旨令兆惠等暫回軍營一面
命理藩院行文俄羅斯薩納特衙門令將阿睦爾
撒納即行送出從前與俄羅斯定議彼此不留逃
人即初定伊犁時俄羅斯逋逃在彼者俱經送還
若果逆賊在伊境內遵諭縛獻以全信義則渠魁
就獲準噶爾一事便可從此奏功設因逆賊之搖
尾乞憐遂至受其愚弄為之隱匿又或別有他意

其應如何索取之處再行相機籌辦朕非窮兵黷武特以事勢所迫不得不然在軍營諸臣心存怯懦未嘗不欲借渡河溺死一語遂圖草草收局而外省諸提鎮不識事機方且飛章奏賀朕既為之一笑且深歎任事之無人也

可將此通行曉諭知之

丁巳

諭定邊右副將軍兆惠等會兵勦賊事宜

上諭軍機大臣曰成衮扎布等招降之沙喇斯瑪呼斯等復叛搶掠臺站雖經滿福阿里衮次第領兵接續但二旬有餘未見軍營奏報深為廕念因思逆賊阿睦爾撒納已逃入俄羅斯即哈薩克未有回音俱無庸守候惟厄魯特逋賊既同往伊犁而降人又復叛去則成衮扎布等軍營兵力稍覺單弱可虞兆惠等若領兵會合擒剿賊衆軍威自振即一時不能盡勦酌定過冬處所暫行撤回駐劄

於明年再行進剿亦可著兆惠富德將現在情形
作速奏聞

己未

命議卹搜殺嗎哈沁陣亡及被傷身死之烏魯木齊
等臺站筆帖式富永塔克什哈等

冬十月庚申朔

大學士管陝甘總督黃廷桂疏奏查拏原任遊
擊對齊情由

黃廷桂奏言乾隆二十一年十一月准軍機處
咨據定西將軍達爾黨阿等叅奏領運口糧之
遊擊對齊沿途遲滯傷損牲隻途遇差迎之人
並不親身運至即私回巴里坤等因欽奉

上諭交臣拏解來京當即知會巴里坤大臣拏解日
久未到經侍郎阿里衮准副將軍兆惠咨覆對
齊於十月至濟爾哈朗正值撤兵其沿途有無
遇賊陣亡或被衝散無憑查察本年九月阿里

袞復准兆惠等咨沿途勦賊並無對齊之信臣
查原任遊擊對齊既輟轉行查無憑拏解理合
奏明奏入得

旨下部知之

辛酉

申諭辦理準噶爾回部本末

上諭大學士曰逆賊阿睦爾撒納渡河溺死之事悉
屬子虛昨已有旨宣諭中外矣在逆賊之由哈薩

克敗逃或竟投入俄羅斯或又遠竄他處議論紛
然此時原無實據如果投入俄羅斯則我朝從前
與俄羅斯定議不留逃人阿睦爾撒納乃叛逆之
渠魁罪大惡極尤非他逃人可比何可置之不問
以情理論之在俄羅斯素守舊約自應即為縛獻
今理藩院行文向索果能遵旨送出固屬甚善若
文移往返稍有稽遲亦惟相機酌理物來順應朕
於此事不設絲毫成見非以阿睦爾撒納一犯又

欲用兵於俄羅斯為窮兵黷武之舉也但軍國重
務諸王大臣皆為朕倚任之人自宜咸使與聞如
有所見亦可據實直陳以備采擇乃大學士史貽
直則有棄伊犁之說此時叛賊未獲與伊犁何涉
而陳世倌所奏糧餉馬力將帥三語亦不過紙上
陳言即以糧餉言之乃綠營中所謂兵行糧隨之
陋習耳試問邇年來西路進剿曾有轉運之勞乎
國家一切經費賞賚賑卹之需曾有以軍興而稍

為減省者乎是以朕辦理事之始末尚未領會
因令莊親王等十六人公同酌議乃其所議亦俱
未中肯綮無一良謀定見可以為朕分憂者朕於
準噶爾一事初雖機有可乘因慮任事無人是以
遲回審顧不得已而後辦理及伊犁既已平定朕
意原不過就其四部分封四汗以示羈縻而已前
所撰太學碑文及封四汗之詔具在此諸王大臣
所共知共見者至阿睦爾撒納叛逃遂煽動降人

變生意意外因緣輾轉以至今日揆之事機實有不
能中止之勢而衛喇特之衆或誅勦或病亡即舉
而畀之一人且無可授之者此或者

上天將以全部衛喇特賜我國家耳即如副都統阿
敏道領兵前往葉爾羌喀什噶爾地方竟為兩和
卓未誘殺此豈有不行征討之理而內外諸臣未
必不以阿敏道之死既已加恩優卹何必因一人
而用兵又滋勞費此言朕固知之殊不思諸臣設

身處地如使已為阿敏道冥冥之中其能甘心乎
且國家有何不足有何不得已而朕竟忍心於死
事之臣而不為之復仇也昔樊噲請以十萬衆橫
行匈奴季布以為可斬此在漢時則然而非所論
於我大清堂堂之天朝乃甘以唾面自乾為自全
之善策何為者哉集思廣益固期於事有濟若徒
築舍道旁不若姑置之待朕之自為應機決策耳
將此通行傳諭知之

臣等謹案伊犁平定以後

皇工仁示綏懷即欲分封四衛喇特撫其餘衆各予
安全乃阿逆偕

德叛逃以致煽動降人再加征討則逆賊之喙走遁
逃實準部全局所繫有不能稍緩窮追者乃
忽傳言溺死順德訥等方信以為真而

睿照如神燭知其妄未幾果聞其竄入俄羅斯境是
鬼蜮伎倆已無所遁形況俄羅斯素奉不納

逃人之約則執言索取彼且無辭又何庸過
為顧慮至其事之進止操縱相機籌勢早已
定自

淵衷及蒙

宣示咨詢而發言盈廷無一人能中窾要迨俄羅斯
呈獻逆屍益欽

聖明鑒事銖黍不爽而

宸斷之成實非諸臣拘墟淺陋所能仰窺萬一耳至

如回部逆酋負

恩反噬戕我王人尤聲罪致討所必及若稍存姑息
何以凜士氣而慰忠魂恭繹

諭旨設身處地之訓凡有血氣心知者疇能不意慙
而顏泚哉

壬戌

工幸南苑行圍

命哈薩克使臣亨集噶爾等隨侍觀圍

諭陝甘借帑採買馬匹應扣銀兩分別豁免展扣
上諭大學士曰前因陝甘二省官兵採買撥解馬匹
及各標營摘缺買補借動公帑若依限扣還兵力
未免拮据降旨該督應作何展限加恩之處查明
具奏今據黃廷桂奏陝甘二省滿漢各標營借墊
未還銀三十五萬九千三百兩零其解送馬駝漆
補口食盤費等項除季餉坐扣外尚未還銀六十
萬八千三百兩零等語此所奏借墊未完之三十

五萬餘兩著加恩免扣以示優恤其坐扣未還之六十萬餘兩著酌量分別年限按期展扣以紓兵力該督撫其善為經理務俾均需渥澤以副朕加惠邊兵至意該部即遵諭行

癸亥

申諭定邊右副將軍兆惠等定議會兵進剿事宜

上諭軍機大臣曰兆惠等奏稱帶兵前赴闐勒奇博羅布爾噶蘇策應成衮扎布協力擒剿巴圖爾烏

巴什等餘兵留與富德搜查阿睦爾撒納守候差往哈薩克之使臣信息等語先經諭令兆惠帶兵會同成袞扎布進勦令富德在彼候信後因成袞扎布奏報數日未到復諭伊二人帶兵前往迄今仍未奏報深為廕念兆惠不必候成袞扎布等來信即合兵協力進勦富德與其在俄羅斯哈薩克界上坐候信息莫若帶兵來迎沿途搜勦賊眾或於兆惠所至接應或由塔爾巴噶台相通察罕烏

蘇路徑前往則各路有兵愈覺聲援相接伊等可
相機商酌如三路合兵一處即有三千餘人賊雖
俱到伊犁計其妻孥外亦不過二三千人且衆心
渙散易於殄滅如一時不能盡勦即遵前旨收兵
暫回將軍成衮扎布等即來京請訓至屯田一事
厄魯特不習耕作須用回人及綠旗兵丁亦著會
議具奏

甲子

賜哈薩克阿布賚等

勅書

奉

天承運

皇帝勅諭哈薩克汗阿布賚阿布勒比斯爾等遣使
亨集噶爾塔納錫阿塔海烏穆爾台都楞阿蘭扎
拜克奈等於熱河朝覲朕加恩筵宴擬從行在遣
回而亨集噶爾等懇請來京是以令其隨駕入都

重申宴賚念阿布賚等遠在外藩若照內地扎薩
克授以爵秩恐爾等有拘職守仍依爾舊俗各安
游牧庶無擾累若爾等遣使入覲朕不靳恩賞至
爾來使奏稱塔爾巴噶台原係爾等舊游牧懇恩
賞給等語此地新經平定尚屬荒閒朕本無所惜
但爾等甫効歸誠未有功績若即行賜給於國家
體制未合爾心亦必不安爾等果將逆賊阿睦爾
撒納擒送前來自當加恩賞給爾使臣來時正值

大兵絡繹前進是以由西路行走今當冬季撤兵之期恐長途防護稍疎賞賜爾等物件致有遺失茲特派散秩大臣和碩齊巴圖魯侍衛富錫爾穆倫保帶領索倫蒙古兵丁護送爾使由額爾齊斯塔爾巴噶台至古爾班察爾其賜爾阿布賚阿布勒比斯衣物若干使臣到日爾等祇受又賞來使七人衣物若干及使臣隨僕等市買物件共賞銀千兩俱諭爾等知之嗣後勉抒誠悃自必賞加恩

澤永享無窮之福特諭

命送克勒特總管根達什等來京

上諭軍機大臣曰阿里衮等奏稱侍衛寧古里等將克勒特人衆送至巴里坤其總管根達什副總管莽蘇爾及男子九百餘婦女一千七百餘俱送至肅州照前次辦理已行文黃廷桂等語甚屬拘泥從前辦理厄魯特者因其畏威降服心懷叵測今克勒特等人衆與沙喇斯瑪呼斯等游牧同行並

未逃叛尚屬可憫著速傳諭黃廷桂侯根達什莽
蘇爾等到日曉諭云爾等降人多難憑信巴里坤
大臣原欲照例辦理大皇帝憐爾等尚屬安靜恩
旨送入內地養育即將伊等妻孥親戚同送來京
其餘人如全到肅州亦不可安插一處或分賞鄰
省官兵如一省難容即分發數處亦可并諭阿里
衮等知之

瑪呼斯得木齊達什敦多克收楞額庫克新等

以呈報沙喇斯叛信

授侍衛職銜仍酌賞銀兩其隨僕十人於軍營聽候
委用

乙丑

訓諭定邊將軍成袞扎布等

上諭軍機大臣曰成袞扎布等奏稱現在領兵至伊
犁河因奏報逾期未回查係臺站斷絕即於濟爾
哈朗等處新設臺站并將節次奏報補遞等語閱

伊等屢次奏到事件尚無端緒一意遷延即如明
瑞色布騰巴爾珠爾雖應派令軍前効力但伊等
初履行間豈能專倚勦賊奏內據明瑞等報稱追
賊至伊犁河候副都統由屯兵到合力前進及由
屯已到正在整理器械又因將軍處差人到來是
以守候等語若果整理齊全應即速行追勦尚何
守候之有又據愛隆阿報稱勦賊之厄魯特博和
勒即殺宰桑吞圖布之人等語從前伊等奏稱博

和勒往投巴圖爾烏巴什因其擅殺宰桑遂行殺戮等語與此次奏報不符又所奏捉生詢問察卜察里嶺口有步行踪跡等語其後來供吐若何未經奏明此數事俱屬既往亦無關緊要但伊等心神脅亂辦理周章之處即此可見今特為指出著於便中覆奏前曾諭進勦之時著鄂實同往何以止明瑞愛隆阿前去亦著明白回奏此次雖據稱勦殺賊衆數百人而渠魁總未弋獲宜觀後效以

定功罪伊等接到此旨能即時進勦固善如不能
即暫時撤兵過冬所有陣亡及帶傷人員著查明
優恤其厄魯特都喇勒哈什哈察罕莽鼐索倫阿
卜坦察等見河岸步行數賊即渡河擒拏尚屬奮
勉或應賞翎及賞給銀兩之處著將軍成袞扎布
酌量辦理

命駐劄巴里坤辦事大臣阿里衮會同滿福進勦
工諭軍機大臣曰昨傳諭阿里衮安接臺站勦殺嗎

哈沁等其諭成衮扎布之旨亦發與阿里衮轉交
今覽成衮扎布等奏摺知巴顏阿滿等臺站尚未
接續現在軍營事件俱由額林哈畢爾噶馳遞則
滿福之兵諒難勦賊阿里衮接到此旨即帶兵前
往與滿福會合共勦沙喇斯瑪呼斯等賊軍營奏
報既由新設臺站馳遞則伊等發交軍營之旨亦
於此路發往至沿途盜賊未除吐魯番辦運軍營
口糧更當加意照管其巴里坤撥送羊隻現辦撤

兵無庸多發阿里衮如已起程著豆斌遵照辦理
亦傳諭雅爾哈善等知之

丙寅

定邊右副將軍兆惠等疏奏哈薩克情形及擒
送叛賊烏勒木濟

兆惠等奏言據額爾克沙喇努三等報稱七月
初一日入哈薩克游牧遇頭目多羅特拜報知
阿布賚於二十二日相見阿布賚跪請

聖安我向阿布賚云爾等歸降

大皇帝深為嘉悅如頭目人等欲邀

恩賜封號即開列部落姓名報知轉

奏阿布賚具言逆賊阿睦爾撒納被圍脫出之事

告以將軍大臣等不獲阿逆斷不撤兵阿布賚

請問將軍等來書帶領官兵協同搜捕之故答

云爾處久未擒送故欲遣我兵相助又恐驚爾

游牧先行告知阿布賚約於後日會議至日阿

布賚告以現在實無阿睦爾撒納其請

賜封號約明日再議次日阿布賚遣人告病十餘日

未相見因向伊屬人訪問有云阿布賚等與阿

睦爾撒納約誓不便擒獻八月初九日往見阿

布賚備述利害阿布賚指子弟為誓因問逆黨

哈丹之宰桑烏勒木濟何以未見擒送阿布賚

云聞在霍集伯爾根處即遣人往取自此十數

日與阿布賚相見將鄂爾圖玉斯烏拉玉斯齊

奇玉斯三部落頭目開列名單阿布賚又云將
軍大人等曾告言

大皇帝仁恩不改我等制度更為感戴因問及行期
告以必獲阿睦爾撒納始可回報阿布賚又云
聞阿睦爾撒納有逃入俄羅斯之信已遣人往
探等語又據額爾克沙喇等續報阿布賚請於
烏隆古地方將馬匹易換貨物告以道遠商販
不便約於明年七月在額林哈畢爾噶烏魯木

齊等處交易等語臣等伏思阿睦爾撒納已逃
入俄羅斯額爾克沙喇等不必久住哈薩克應
請撤回至烏魯木齊現在酌議屯田與哈薩克
貿易甚為有益臣兆惠擬於九月初十日起程
向博羅塔拉布爾噶蘇台會合成衮扎布等值
哈薩克遣使將烏勒木濟送到查係始終黨助
阿逆要犯派員拏解送京十四日將哈薩克來
使遣回即起程前往奏入報

聞

諭兩路將軍大臣籌畫進剿事宜

上諭軍機大臣曰兆惠奏稱伊等俟哈薩克來使起程即領兵前會成袞扎布等語想此時已合兵一處矣但時值冬寒未必即能進剿或遵朕前旨將兵撤回至哈薩克曾有拏送巴圖爾烏巴什之言但從前哈薩克尚為所敗且成袞扎布捉生詢問俱云綽和爾烏喇特昂吉岱等賊俱於八月初往

投巴圖爾烏巴什賊勢頗衆仍須發兵進勦厄魯
特情形青草未生自不移動應選兵一二千人於
明春前往沿途勦賊收其牲畜於朱爾都斯牧放
會合辦理回部之兵自然聲勢雄壯但巴圖爾烏
巴什聞已逃往沙喇鄂勒伊等過冬地方未定應
計所駐之地於三月十五日以前可到沙喇鄂勒
即將起程日期行知黃廷桂將馬匹豫為趲送至
各處兵丁合計若干勦巴圖爾烏巴什等賊需用

若干平賊後約於何處會合辦理回部官兵會合
後兵數頗多有無餘兵應令駐候更代俱著早為
酌議不必候來京定奪伊等定議具奏後成衮扎
布帶定邊將軍印來京兆惠右副將軍印交雅爾
哈善管理羅卜藏多爾濟明瑞色布騰巴爾珠爾
亦於將軍大臣後作為一起前來福齡安亦隨伊
兄明瑞來京旺布多爾濟在軍前數載應暫為休
息著於阿濟必濟路回伊游牧前諭富德帶兵接

應兆惠今既撤兵亦無庸前往與成衮扎布等同
來至額爾克沙喇努三等在哈薩克索取阿睦爾
撒納今阿逆已逃入俄羅斯著富德行文撤回額
爾克沙喇此次頗屬奮勉亦歸伊游牧休息可傳
諭富德知之

諭大學士管陝甘總督黃廷桂烏魯木齊屯田事宜
上諭軍機大臣曰兆惠等奏稱烏魯木齊地方可以
耕種又與吐魯番相近若哈薩克往來交易亦屬

甚便今陝甘馬匹仍須多備請於明年哈薩克馬
匹到日前往交易等語著黃廷桂於綠旗兵內多
選善於耕種之人發往烏魯木齊明春即令試種
地畝量力授田愈多愈善即遵諭速行仍將選派
官兵人數及督率員弁指交地畝陸續奏聞其送
至巴里坤豫備交易之緞布亦著即速起運兆惠
奏摺併發

諭署定邊左副將軍策布登扎布辦理烏梁海事宜

上諭軍機大臣曰策布登扎布等據總管哈克圖報
稱招降阿勒坦淖爾四得秦之烏梁海伊等在準
噶爾舊例每戶納貂鼠一個後經俄羅斯索取並
未給與今情願歸附輸納稅賦等語甚可嘉憫著
策布登扎布查明四得秦頭目若俱係得木齊則
授為佐領等官其哈克圖加恩賞給孔雀翎併酌
量賞給緞疋至察達克屬下烏梁海原未納賦與
新降之人似屬不均從前伊等每戶原納準噶爾

貂鼠六個後經減二交四今著加恩止納二貂俱
交與莫尼扎卜傳諭併計其戶口若干應納貂鼠
若干呈報具奏其察達克屬下既俱納賦則伊等
亦應給俸亦交莫尼扎卜查辦按其品級照內地
官員減半支給從前辦理烏梁海事務專委策布
登扎布今著車木楚登扎布一同管理前令伊回
游牧休息今既同察達克等辦理烏梁海博和勒
等事自應奮勉前往効力竣事之後再回游牧又

諭曰策布登扎布據莫尼扎卜等報稱烏梁海博和勒等歸附尚屬游移據察達克等請派兵四百名前往招服應請派布延圖軍營索倫喀爾喀兵一百名令車木楚克扎布帶領前往所辦甚是已傳諭車木楚克扎布矣但朕因納穆扎爾等所奏曾令回游牧休息想已起程著策布登扎布即將此旨速傳車木楚克扎布仍回軍營可也

諭山西巡撫塔永寧辦給降人籽種

工諭軍機大臣曰策布登扎布奏達什達瓦屬人及
扎哈沁等所種麥石惟大麥有收僅供食用未餘
籽種何傳諭塔永寧照例辦給達什達瓦屬人籽
種一百五十石扎哈沁等籽種一百石噶爾丹達
爾扎等籽種五十石伊等所種地畝氣寒霜早俱
用大麥為宜速為運送毋悞農時

平定準噶爾方略正編卷四十四